

Cun CampCadi a Minca

Suenter ina pausa da dus onns, caschunada entras corona, han ils giuvenils denter 11 e 16 onns dalla Cadi puspei saviu separticipar ad in camp dalla Fundaziun Tür auf – mo vinavon. Rodund 30 persunas da Tujetsch entochen Trun han nezegiau la caschun ed ein stadas ina jamna a Minca ella capitala dalla Baviera. «Gia per la siatavla gada essan nus cun in camp da giuvenils en quei marcau, adina puspei cun in program optimau.» Sper il star da cuminonza dat ei in program zun variont: ina part pli pretensiusa ed in'otra da divertiment. La part da divertiment ensiara las seras da far bogn, las spassegiadas el marcau e muments/giugs communabels.

In marcau captivont

«Ella part pretensiusa essan nus sefatschentai uonn cunzun dalla historia zun tresta dil marcau e dalla regiun avon e duront la Secunda Uiara mundiala. Gest duront dus dis vein nus tractau il tema, inagada a Dachau el camp da concentraziun, lu era el niev center d'informaziun sil Königsplatz. Persunas cumpetentas han accumpignau nossas gruppas e capiu dad instruir nossas giuvnas e nos giuvens a moda simpatica ed interessanta aschia ch'ils dus dis ein daventai ils puncts culminonts dil camp.» Era la viseta tier CEWE, il pli grond producent da products fotografics dall'Europa, ina viseta tier il construider dad autos BMW, lu il stadion olympic e l'Allianz Arena han anflau in bien resun tier ils giuvenils. «Interessai han era visitau il Museum tudestg e sin viadi anavos a casa vein nus lu aunc reteniu tiel casti da Neuschwanstein per suenter dar adia alla Baviera.»

Per nus menadras e menaders eis ei stau bi da veser co ils giuvenils ein sefatschentai in cun l'auter: vegls e giuvens ein stai cheu in per l'auter e segir ha ei dau novs contacts che vegnan a restar, cumbinai cun bialas regurdientschas. E sco duront tut nos camps ha ei era giu num planisar il proxim, al qual puspei ver 30 giuvenils da Tujetsch tochen Trun san separticipar. Sut campcadi.ch, nua ch'ins vesa dil reminent era impressiuns dil camp 2022, suondan proximamein las informaziuns leutier e nus selegrein d'astgar accumpignar ina nova gruppa l'auter onn en ina ulteriura regiun dalla Europa dil Nord.

Per la gruppa da CampCadi,

Gion Tenner



Avon il camp da trenament dil FC Bayern München.



Impressiuns dil viadi a Minca.

FOTOS MAD